

MURIELLE BROWN ROOS

Murielle su pasion pa traha cu mucha, el a descubrie prome cu el a bay studia afo, ora el a traha na Meta Care cu e muchanan eyan. E ta encanta nan spontanidad, honestidad y nan manera di wak bida. El a opta pa studia pa docente na Aruba mes, esta IPA unda el a termina su estudio como docente. E no a haya trabou inmediatamente na Mon Plaisir, pero a cuminsa traha na un scol publico como maestra di klas 4. Actualmente e tin 4 aña ta dunando les como docente di klas 6 na Mon Plaisir, cu sigur tin un balor sentimental tambe p'e y su famia, ya cu tanto su mama, su ruman muhe, Murielle mes y su casa Patrick, a bishita Mon Plaisir ora nan tabata chikito. Awo su yiu homber Thomas y e tres yiunan di su ruman muhe tambe ta alumno di dicho scol.

Un poco di historia di Mon Plaisir

Na aña 1950 Murielle su wela, Ellen Croes-Raven, cu awor tin casi 90 aña, tabata un di e personanan cu hunto cu un grupo di Hulandes, Surnameo y Arubiano a lanta e scol Mon Plaisir Basisschool. Na cas di Dominee Baart e interesadonan a bin hunto pa lanta un scol Protestant. E nomber "Mon Plaisir" ta Frances y ta nifica "Mi Placer". E nomber ta bin di un plantacion di aloe cu tabata tin e mesun nomber. E doñonan di e plantacion tabata señor Louis Bazin y señora Regina Jacomina Croes cu ta Murielle su tata abuela. Regina Jacomina ta yiu di Lourens Croes y Magdalena Specht. Lourens Croes tabata director interino di e minanan di oro di nos isla. Señor Louis Bazin a bin Aruba en busca di oro, mescos cu hopi hende tabata haci despues cu na maart 1824 e hoben Willem Rasmijn a haya oro den Rooi Fluit. Louis su buskeda di oro tabata hopi exitoso y el a logra crea un bon fortuna cu esaki. Na 1838 el a casa cu Regina Jacomina Croes y e ta haya un pida tereno pa produci aloe riba dje. E ta dun'e e nomber "Mon Plaisir". E plantacion di aloe Mon Plaisir tabata uno hopi exitoso. Despues cu tanto señor Bazin como Regina Jacomina a fayece, gobierno a compra e tereno y e bario di Mon Plaisir ta surgi. Mon Plaisir Basisschool tambe a keda construi riba e tereno, unda anteriormente e plantacion aki tabata situa.

Con bo ta describi bo personalidad?
Mi ta un juffrouw cu hopi pasenshi, activo, alegre, y social. Mi ta gusta combersa cu mi alumnonan. Mi ta purba di saca e miho den tur e alumnonan.

Con bo ta sinti diariamente memey di bo alumnonan y di ki manera nan ta inspira bo den bo pasion y vocacion pa docente?

Mi ta lanta tur dia cu gana pa bay trabou. Mi mester sinti mi mes hopi malo pa mi no bay traha. Mi ta hopi consciente di e echo cu mi actitud tin un influencia grandi riba mi alumnonan. Mi ta gusta lesa pa mi alumnonan y combersa cu nan riba diferente topico. Nos a hasta introduci un actividad nobo e aña aki den klas 6: 'Tea Time'. Riba e mainta aki, nos ta sinta bebe te hunto den klas

y combersa riba un topico specifico. Bo ta ripara cu e muchanan tin hopi necesidad di combersa y intercambia idea. A pesar cu mi muchanan tin 11 pa 12 aña, mi ta gusta lesa un storia of articulo di corant pa nan. Pa grandi cu nan ta, nan ta gusta pa mi lesa pa nan. Mi ta trata na trece e bukinan di diferente genero, pa asina nan haya un tiki di kico tur tin na material di lesa. Mi ta sinti mi mes satisfecho y orguyoso, ora mi logra yuda mi alumnonan y mira nan crece den un aña escolar. Esaki ta duna mi e gana pa sigui cu mi trabou.

Cua ta bo hermentnan esencial pa tin den bo bida diario?

Mi ta lanta tur dia cu un actitud positivo, hopi pasenshi, entusiasmo y gana pa contribui na nos isla y futuro generacion. Djis di pensa cu bo por yuda un alumno, trece un cambio, bin cu un idea nobo of soluciona un problema, ya ta haci e chens cu esaki lo sosode hopi grandi.

Ki ta e cosnan positivo cu ta pasando den educacion na scol y na cas? Y con bo lo kier impacta den e esfera aki?
Mi ta kere cu e mundo digital a trece hopi cos bon pa nos educacion, tanto pa e maestronan como pa e alumnonan. In-

Stimula lesamento y ampliamento di e vocabulario ta e base cu nos tur mester pa resto di nos bida

FUN FACTS

Hobby:	Conta storia, Saca potret,
Gadget:	Digital Camera
Fragancia:	Valentina by Valentino
Holoshi:	Fruits
Color:	Fuccia
Pelicula:	Girls Rising
Buki:	'Imagine; How creativity works' by John Lehrer
Cancion:	'Loving you is easy' by Sarah Mc. Lachlan
Cuminda:	Indian food
Motto:	Let the beauty of what you love be what you do - Rumi

Hair & Make-up: The Stars Hair Studio
Vestuario: Adolfo Dominguez, Renaissance Mall
Acesorio: Rage, Renaissance Market Place
Localidad: Divi Phoenix Beach Resort
Fotografo: Mayo Stoppels

formacion y e ideanan pa e les cu un maestro of alumno mester, ta mas accesibel. Ami mes ta uza hopi internet, pa bin cu e ideanan nobo pa un les specifico, pero tambe pa lesa diferente articulo tocante educacion. Na scol nos ta haci uzo di internet, pa entre otro wak Jeugdjournaal (noticia na Hulandes pa mucha) y nos ta traha cu Nieuwsbegrip (metodo di lesa digital di noticianan actual). Banda di e importancia di digitalisacion, mi ta keda pone enfasis riba e importancia di lesamento. Stimula lesamento y ampliamento di e vocabulario ta e base cu nos tur mester pa resto di nos bida. E concentracion y imaginacion cu lesamento ta rekeri di un persona cu ta lesa ta unico y niun otro medio (pelicula of programa di television) ta desaroya esaki. E mesun concentracion aki ta necesario pa e mucha por concentra den klas riba e otro lesnan.

Mi ta hopi consciente di e echo cu mi actitud tin un influencia grandi riba mi alumnonan

Bo ta Bo y haya cu e rol di docente tin cu vence hopi obstaculo of adversidad pa por funciona optimalmente?

Si, e circunstancianan no tur ora ta na fabor di e maestro, pero mi ta kere cu e actitud cu bo tin como maestro ta hunga un rol hopi grandi, pa bo por bin na e solucionnan cu lo ta na bo fabor di bo alumnonan y e metanan cu bo kier logra den enseñansa. Ta importante pa bo sa cu trahando den conhuntito cu bo team bo por logra hopi mas, banda di cu bo por siña hopi di otro tambe. Door di comparti y traha hunto, bo por evita cu bo ta stop di crece y asina cana cu e tempo, ya cu un ta pusha otro pa no keda haci e mesun cos.

Kico bo ta desea di tin den bida?

Salud, amor, felicidad y satisfaccion di por contribui na e bienestar di mi famia, amistadnan, alumnonan, coleganan y mi isla stima.

Ki legacia lo bo kier laga atras?

Awor cu mi mes ta adulto y mi wak bek na e añanan cu mi a bay scol, mi ta corda algun maestro(a) cu a haci un impacto riba mi persona y cu mi ta aprecia masha hopi mes. Nan ta forma parti di e persona cu mi ta awe. Mi ta spera cu un dia mi alumnonan lo corda mi, como un di e maestronan cu a pone nan kere den nan mes y cu a siña nan pa tin amor pa educacion en general y lesamento en particular.